

臺灣文獻匯刊

■ 陳支平 主編

第二輯

第四冊

◎◎ 九州出版社
◎◎ 廈門大學出版社

臺灣文獻匯刊

第二輯 ◎ 第四冊

閩頌匯編(四)

◎ 九州出版社
◎ 廈門大學出版社

禁雜派供應 十一月十九日

爲嚴禁雜派供應以蘇民困事照得海鹽系
平軍務繁劇一切糧料鉛硝灰炭無不取給
于民間雖一草一木槩經現發時價而輸將
轉運之苦非言可喻本部院軫恤無方惟期
二三司牧深心愛養極力撫循于不得已之
中少存不忍斯民之意庶幾少蘇旦夕詎訪
各縣官貪吏蠹染習陋規徵比錢糧額外苛
索奉催物件取少派多甚至該縣文武日用
饗殮以及迎送宴會無不火票風籤濫取供

應快已則閭閻之膏髓已枯拂已則鞭朴之
皮膚立潰方今哀鴻初集草野凋殘爾等身
居地方名爲父母縱調劑之弗及尙堪此喪
心逆理以剝削吾民爲耶除查實飛奏外合
行出示禁諭爲此示仰該縣文武官吏兵民
人等知悉嗣後各宜洗心滌慮痛改前非徵
比錢糧除收納正供之外不許私加火耗奉
催物料照上行採辦之數不許用少取多如
有日用饗飧以及迎送宴會薪米布帛菜蔬
猪鷄等項敢以供應爲名不照時價給發現

銀擅行硃標濫取者一經查出官則先拿後
叅蠹則立行梟斬本部院矢清執法各宜凜
遵毋貽伊戚

閩頌滙編

--	--	--	--	--	--	--	--	--

申禁結盟 十一月二十二日

爲嚴禁聚衆結盟以靖地方事照得民間本
分事業惟有力田讀書年在後生更宜率循
惟謹近訪漳屬各鄉黃口監子學爲無賴少
年串交各營兵丁聯絡村庄地惡糾合立社
多至一二百人少亦數十人設酒歠血名曰
結盟自恃有黨有羽可以放膽橫行于是咆
哮閭里欺虐善良甚而或合夥執械昏夜剽
掠或興販貨物透越出界爲亂之階實由于
此夫糾黨結社業奉

嚴綸特行禁止犯者立寘重典鄰右一體連坐
爾等豈未之聞此雖子弟之犯法亦父兄之
教不先耳除現在密緝外合行示禁爲此示
仰各地方諸色人等知悉示後務須作速解
散痛改前非各安本分生業該父兄亦須諄
諄告誡如再有無賴之輩糾結盟黨恣肆非
爲一經發覺定卽嚴拿正法父兄隣右一併
治罪倘有營兵入黨朋奸查出卽以軍法從
事各宜凜之

總督福建少保兵部尚書姚公文告

閩中 子民 鈔

曉諭界外遷民

康熙十八年十二月初二日

爲曉諭事照得本部院現在整棚水陸兵馬
卽日大舉進勦雖紀律霜嚴經過秋毫無犯
但旌旄一臨海島不無玉石俱焚本部院念
爾界外遷民俱屬版圖赤子若不預先告誡
或者尙在沉迷萬一馬首刀頭豈不深負
朝廷好生之德合行出示曉諭爲此示仰界外
姓人等知悉本部院親統滿漢官兵不日進

勦海賊界外居民速宜携帶眷口搬入內地
安分樂業已往前愆槩行赦宥如有廬舍田
園准免夫徭雜派倘或資生不給另爲安插
撫綏本部院言出由衷爾等歸來毋緩倘或
遲疑猶豫大兵一到悔無及矣

曉諭臨陣投降

十二月初十日

爲曉諭事照得海賊勢窮力竭本部院現在
整頓兵馬大舉進勦掃蕩逆氛已在指顧間
但念從逆之人或爲賊威所脅或爲饑寒所
迫一時誤入賊夥原其初心本非得已今賊
寇滅亾在即諒爾等咸切歸正之思祇緣苦
被拘繫一時未得脫身若干進勦之時繫將
爾等盡膏鋒鏑本部院有所不忍今臨陣之
際爾等能解甲投戈奔來投降者與平時投
誠犒賞一體錄用必不使皂白無分致辜爾

等歸降之真心合行出示曉諭爲此示仰各
鎮營官兵及海上僞官僞兵知悉自後臨陣
對敵之際賊有拋戈解甲丟去刀械奔來歸
降者卽係向化之人悉照投誠賞格十款從
優給賞官則

題授實職兵聽入伍歸農凡在我師隊中認係
投戈奔陣之人不許殺戮更不得詐爲生擒
冒混獻功該官兵收過奔投人若干仍准叙
功海上人衆速自決計勿懷疑畏有負本部
院好生至意

招諭潮陽等處 十二月十一日

爲招諭事照得附逆之輩皆非得已總因先
年鄭經作祟蹂躪邊陲不得已隨波逐浪誤
入岐途本部院仰體

皇仁弘開招撫頒懸十款賞格處處向化歸誠獨
是潮陽揭陽普寧澄海石井砲台黃岡等處
達濠廈門等島尙躡蹠觀望疑畏不前本部
院現在會同

平南將軍

廣東督院 撫院 提督修造戰船整飭兵馬

水陸會勦用彰

天討但念爾等漳潮遠隔輸誠無路本部院厚待
投誠至意或者未曾親覩是以遲疑悵望不
敢來歸今特差隨征通判黃書田知縣李標
桂前往招撫宣布德意合行示諭爲此示仰
海上僞鎮管官兵人等知悉速宜去邪歸正
鼓舞輸誠本部院俱照後開則例

題授官爵信賞有加斷不令懷才將士淹沒不
彰且必使轄下兵丁同歸溫飽本部院看待
投誠情同父子始終如一爾其速來勿失機

會

偽官帶兵五十名投誠者賞銀一百兩卽

題實授守備員缺帶兵一百名投誠者賞銀三

百兩卽

題實授都司員缺帶兵二百名投誠者賞銀四

百兩卽

題實授遊擊員缺帶兵三百名投誠者賞銀六

百兩卽

題實授叅將員缺多者遞增帶兵五百名投誠

者賞銀一千兩卽

題實授管兵總兵員缺帶兵一千名投誠者贈銀五千兩卽以侯伯銜兼管綠旗營總兵事具

題實授如初到候補仍照銜給俸優加欵待兵丁長髮者前賞銀三兩今改賞銀四兩半髮者前賞銀一兩伍錢今改賞銀二兩隨帶軍器甲械亦照格增賞入營前給銀八錢或一兩不等今各投誠兵願食糧者卽給以一兩五錢如願歸農准給路費回籍安插得所豁免差徭

禁遏糴包折 十二月十五日

爲嚴禁遏糴包折之弊以平米價事照得泉州居邊海之衝兵民食齒不下數十萬近聞米價湧騰兵民交困揆厥所由蓋因永春德化安溪各縣米穀禁不出境運米船隻片帆不至府城在泉富豪貪圖高價居奇閉倉不發更有一種奸棍猾胥帶包外府外縣應解糧料就泉代買以致米價日高一日每石貴至三兩四五錢此泉州數年以來未有之高價際此西成未幾遽爾騰貴若不嚴加痛禁